



永平府志卷之二十

萊陽宋 琬遺次

宜興路

遼參校

廣寧常文魁續補

人物後

忠孝節義矯矯著烈寃之直完其為人而止固亦人
人宜盡之事却非盡人可概見之事在人本屬庸行
而稟其地間氣以生足為世道維繫綱常此則如山
川之有河嶽霄漢之有日星也垂名青史故昔有用
玉管編記者余補人物志採厥遺徽別為表著使後
之觀于斯者得知某也忠某也孝某也節與義其亦

有感而思勵也夫

國朝

順治

孟喬芳字心亭永平人以世胄奇勲早荷

大清太宗皇帝識拔戎行委托心膂畀任明刑會

大清仗義驅寇定鼎燕都應運從龍掃蕩克氛暨

世祖御極之初念百二雄關肩鉅邊陲非公不可故特陞

川陝總督專授節鉞繇甲申牙纛出冀北收服兩

河綏靖三晉旌麾旋抵關中繼以招徠遐陬公相

貌魁梧豐項碩腹山巖其相而汪洋其度怡顏霽

色褒功宥過隨材器使悉覩實效萬姓歡呼約束

滿漢健卒驕馬俾市廛無擾後先歷治關省自中

丞藩臬諸大夫總鎮征守諸大將軍隄縣諸有司

咸敬異如神明倚依如師保而歸宿乎法廉軍國

巨細事務必躬先臨會府虛公諮詢哀矜民隱俾

無含抑待縉紳矜士體備禮優八流以內三輔以

外實惟憑藉叛孽賀珍連賊數萬圍攻西安雨矢

雷砲勢薄聲崩公親御敵樓談笑指揮鎮靜無嘩

城中市沽不變若不知有賊者遂授符總兵陳德
軍西門任珍軍北門指揮戈馳突犯賊營斬驍獍
用是賊懼會李固山額真兵至合力堵殺摧北追
殲直抵永壽斬首萬計公身不解甲目不交睫者
七晝夜未嘗言疾嗣有河西猖獗之亂賊兵號稱
百萬朝議將發大兵來秦援勦公疏上請以身任
毋勞師衆督領標將星馳秦州密授總兵馬寧張
勇等竒策異略以精騎五百夜擣賊營奮勇砍殺
一足勅百賊悉驚伏潰遁刻期解鞏昌之圍遂恢

復五涼甘肅擒斬俘馘米喇印丁國棟等而河西
遂平嗣又有山西之變姜瓖餘炎勢逼太華沸汭
黃流公奉命疾馳移兵朝邑聲揚航河陰令總兵
趙光瑞就潼關飛渡一戰復蒲版再戰破陸村三
戰平芮絳僞王授首逆相出降太行以西華岳以
東莫不懷德投誠時又有寧夏之訐載帳孤行鈎
連間諜休肅王之寵貅誅伏王元馬德在咄咭間
擒孫守法金擣巢盤踞而興安之釁永消荆湘餘
氛不敢北向而飲馬嶠函得以高枕無憂也至於

渭北澆南揭竿操戈之徒聞聲潛息四境貼然且
矜閭巷謠訛加以慰諭禁兵馬安插毋入治城至
今愚夫婦哭號而追慕之者順治十一年卒於官
語語宗社封疆未嘗及身後事時天地蒼茫陰風
大來川陝軍民知與不知皆泣慕之勅賜祭葬贈
太保謚忠毅差禮部官致祭

上賜銀四百兩勸葬事又宅一所銀千兩恤其家入祀鄉
賢子熊彌襲阿思哈哈番

蔡士英字伯彥號魁吾襲錦州左屯衛千戶明天啓

二年改入永平衛順治元年以甲喇章京從英
王征李自成三年從經濟王收福建四年陞都
察院左僉都御史尋陞左副都御史六年陞梅勒
章京領八固山紅纓砲軍征姜瓖克汾州下潞安
所向有功秋毫無犯九年陞兵部右侍郎巡撫江
西時當大亂之後重以災荒公私赤立公至即請
免積欠銀二百餘萬兩瑞州府自明初奸民黎伯
安袁州府自僞將歐祥投冊多開民糧幾增一倍
爲二隴累且三百年戶口日耗公爲考求前元故

額反覆陳請得減浮糧二十餘萬石爲二罷永利
初下車值勦叛用兵庫無一月之餉公知州縣解
銀苦藩司胥役勒索令解役赴院掛號設長牌差
人押司吏即日兌收有故索添搭者立杖斃三人
於是州縣解者雲集兵得宿飽先公未至撥江南
銀十七萬協濟猶時時告匱公受事未二載而解
部銀四十餘萬完漕米五十七萬八千有奇遂停
協濟之銀分遣將領擒斬土寇劉京李文斌楊文
苻烈蘧穎等各鹿底定又招流民開荒地二萬餘

頃爲買牛築室親自巡行督察於是江西之民始
知有生之樂請免廣信封禁山開採木植民賴安
堵又以其餘力脩白鹿洞及白鷺鷥湖書院澹臺
祠滕王閣薦福寺碑百廢俱舉士風駸駸振起當
大兵克南昌凡廢紳舊宗一切指爲叛逆係累獄
中公察其無罪盡釋之其在山澤者以文檄諭之
皆出爲平民十一年冬陞兵部左侍郎總督漕運
巡撫鳳陽等處地方值漕政大壞之餘駕小航兼
程東下以次年二月下旬抵淮時重運未來回空

尚阻公請僱民舟通融接濟悉力拮据五閱月而
畢達京倉以至減免耗覈盜拆正身率屬一切清
盤催債無不下令於流水之原在淮二載東南之
人依公爲命以疾乞休十六年海氛內訌瓜儀失
守復起公前職時江北大水流民載道遂不及請
命先捐俸勸助散米賑粥後恐不繼疏請入粟三
百石淮貢蒙俞旨允行故五閱月而存活者二十
餘萬人又請蠲淮鳳徐揚四府州銀三萬餘兩米
麥二千五百餘石期年之間歲稔民和又請復舊

制另設巡撫駐泰州而公但督漕務陞兵部尚書
十八年冬再乞休得允公以至誠感孚特受

簡注故其所上無不朝奏夕可江西大旱巡行所至甘雨
隨車盛夏雨雹公閉戶脩省稼反生而歲倍收抵
淮之初適黃河水涸萬艘膠滯公以牲醴禱神正
辭厲色俄傾之間洪流奔涌歡聲如雷人皆謂公
有回天格神之力而公猶以長運久弊欲倣唐人
轉運之法分達淮上濟寧德州三倉轉遞佇漕盡
去長運之衛弁衛丁而一歸之官收官運使江船

不逾淮淮船不逾濟濟船不逾德德船直抵於京
倉爲

國家無窮之利其所經畫甚具事未果行然其訂謨可垂
於後日云永平志版沉閣於浙公認爲已事不惜
重費運載回永又留心助補宦蹟以足其全隆教
古剎比平大觀年火頽圯幾成丘墟公捐貲勸募
重脩一新增添藏經閣五間巍峩壯麗大倍於前
所著有撫江督漕奏議滕王閣集爲當時名畫子
四長毓榮川湖總督次毓秀官蔭次毓華知縣

毓茂佐領弟朝輔四品官加二級朝佐鎮守浙江
平陽等處總兵孫珍舉人琨貢士

楊文魁號近樓永平衛人由副將公英卓有爲文武
兼濟從征宣力屢立戰功

國朝定鼎初卽擢授工部左侍郎凡條議時務精練豁達
其知料多出人右前奉差監脩奉天諸

陵寢樓櫓橋樑暨金佛喇嘛寺院寶塔義州監造紅纓大
砲三十餘位與各項大工俱先勞無倦鼓舞多方
一時軍役匠作樂其馳驅而服其明恕考蹟稱最

議陞軍門朝議工部缺人加級管事乃卒於官

胡來相號玉衡永平人性至孝事父鯤化母齊氏溫清惟謹居恒言動每以古人自期不輕仕進

國朝丁亥始有用世之志筮仕得元城令時天下初定菑苻未息值賊渠虎踞榆園擁衆數萬大河以北騷然煽動天雄爲畿省要害公日夜撫其民人心賴以寧固至有頑逞者公親冒矢石賊無堅陣又矜撫其流亡諭以恩信賊因相繼降附仍上記督臣創制廬舍使附於籍人情稱便歲嘗苦旱公步禱

祈霖雨大降人咸異之壬辰以卓異擢山西道監察御史其論奏崇大體中外翕然有謇諤聲巡按湖南首以除盜爲已任區畫戰守動中機宜其清藩產緝逋逋勸課農桑使民不擾而食其利迨巡視茶馬甫下車卽召集故老講求遺法定監牧之規嚴勸合之制一時豪右斂手而私販不行孳息日蕃差滿報最遷掌河南道尋陞太常寺少卿克相祀典罔或不肅正議晉秩康熙元年乃卒於官一時惜之

房星燁字肫如永平人由順治戊子貢士授河南睢
州知州公學識優長審達沉毅與民除害不畏權
勢陞漳州府知府者民争相肩輿泣送數十里其
治漳設隄防嚴城守閩南倚爲保障朝議行取內
用值海變中止公嗜經術兼長於翰墨又爲從龍
舊彥時輩皆推重之方議起用疾卒遠近惋惜
房星煥字皓如永平人由籌海功順治十五年特授
江西南康府通判壞接湖山荏苒時發公下車卽
捐俸脩理城濠設礮立旗幟一時猖亂諸盜轉

然遠遁又以餘力脩葺衙宇室阿寢皇煥然一新
署篆饒州代理刑及安仁縣事痛除一切行戶供
應陋習隨行胥役自備糧料備之署內不令外人
見之案牘親裁不輕差後時稱循卓調山東兗州
府泃河廳通判脩舉廢墜設法鎮守百姓勒石紀
德焉尋陞武德道副使駐節德州凡有害地方者
不顧權要執法正之德爲省直咽喉差使繁多州
縣所不能應者公每躬親當之民有冤抑兩造集
庭必霽顏使之各竟其說得情而止未幾卒於官

士民哭臨者殆無虛日至今德人猶稱頌不輟

蔡毓榮號仁菴總漕公長子由刑部理事官奉

旨賑恤大名府籌畫精詳民沾實惠差滿稱最值海寇竊
發侵犯浙楚以公長於經濟領

命征剿所向有功順治十八年特授京畿道旋轉內秘書
院學士康熙六年補刑部右侍郎未幾轉左侍郎
臨政以慎公恕不苛八年轉吏部右侍郎奉

命招撫海寇九年回京復

命轉左侍郎尋

欽命總督川湖

孟熊臣字輔昌永平人由蔭生川陝總督公猶子初
知山西保德州治政明恕保德山荒水涸地瘠民
貧積逋租課久爲官民重累公愛切斃牙不事猷
朴稱貸二千餘金代民償逋去之日紳士中有醵
金爲公備行李者公盡卻之政滿陞閩汀太守閩
以海氛不靖軍務繁興其征援駐防諸大將軍及
臺使往返絡繹芻秣軍糈俱旁午急需公措備安
置諸事稱當而汀屬不困于粟米力役者咸公申

請有方力也順治十八年冬攝漳南巡道篆值海
兵數千奉

令安插杭邑人心危疑公星馳詣杭排群議力陳
當道請以東郊曠土另造營房以居之多方調劑
自春徂秋親率僚屬諭民拮据又具詳家口糧額
俾不病民其綜理詳練如此至今杭之士民爲建
書院於學宮之後以報其功德云

劉良臣字心伯永平衛籍由世襲公嫺於韜畧智勇
過人以軍功授右經左營遊擊剿平流寇有功歷

陞甘肅總兵掛平羌將軍印卒於陣贈右都督進
光祿大夫子澤洪由總兵授三品前程因父良臣
陣沒又授三品前程并授世襲二品前程加一品
服色兼管叅領事孫駿名以父澤洪廕廣東平遠
縣知縣曾孫三長元輅仲元軾季元輔俱以祖蔭
六品職三世遞蒙恩遇寵渥亦當時所不多得者

焦慶延盧龍衛人由世胄任居庸叅將操守廉介居
官嘗買田自給事毋極盡子道兵備道張公春恒
稱之曰武將若慶延何愁不得將士心耶歷任三

屯副總兵稱廉孝將軍庚午閒任戰死俾閒贈光祿大夫驃騎將軍從祀武廟表忠祠

韓師範字宗文號小泉永平衛人由貢士明嘉靖戊子科舉人墨泉韓公梅之子梅任山西大同府府廵丞值邊事孔棘轉輸調度得宜總督翁公萬達器之薦欲大用亡何梅以積勞遭疾卒一時惜之時公尚幼奉母胡氏克盡孝道躬耕力學爲耨諸生每試冠軍及舉明經不樂仕進家脩益勵公學本靜悟爲文悉宗秦漢大家理脉莊重典核衡文

諸臺使及太守顧公每稱爲滄海遺珠公治家嚴肅飲食有制内外有別長幼有序奴耕婢織有隱君子風干謁人事尤所厭絕經年足不履市時稱爲閉戶先生子韓公蓄字懸宰廩生兩中副榜孫景昌字公伯由廩充國學生俱有文行至今詩禮繩繩家聲不墜公之遺風儼然如在云

灤州鄉賢人物宦蹟

後魏

正光

段 永灤州石城人晉匹碑之後魏正光末拜東平
將軍時賊魁王伯生攻陷城壁孝武遣婁昭討之
昭請以五千行公進曰在速不在衆若星馳電發
出其不意精騎五百人足矣帝然之命公代昭果
討平之加公東平將軍汶陽侯

遼

正隆

任 恂灤州義豐人正隆二年間授進士嗜詩書其
文章行實載中州集善書法作真草隸篆氣完力
勁世寶傳之歷北京監鹽使

元

太宗

張 晉灤州人宋橫渠五世孫歷官睢州防禦使太
宗六年賜第於燕并食邑於灤見灤北有橫山追
思其祖榜曰橫雲清逸築橫渠書院於城東南隅

皇慶

弟智爲王府參謀
張 德灤州人宋橫渠七世孫皇慶中登進士授本
州學正文章學行足世其家至

國朝康熙庚戌

督學蔣公起行本府遣本州代祭其祠

灤州鄉賢人物補遺

明

景泰

陳恕字達道灤州人由庚午舉人同知開封府子民下士嚴吏胥折獄立斷嘗遇救人若貴游者公曰此巨盜也邏其實果然人稱神明歸之日泣送者遮路行李蕭然跨驢入城有司重其廉凡有贈即市鐵鑄文廟祭器蓋公生平廉介好施爲諸生時應試適歲饑民輸輓於府偏涼汀道險公出賓

興銀傭工鑿爲坦途至今稱便謝政歸居鄉謹厚
喜怒不形恤苦贍孤凡有關祀典祠廟香火多資
其力時以純德稱

成化

馮清字士潔灤州人由癸卯科舉人公爲諸生時
親喪廬墓三年手植松柏百餘株踰年繁茂青蔥
里人嘆異及爲邢縣令慈義兼施獄有寃囚力爲
詳豁後持金馬以酬公揮之不受乃曰滌爾寃者
國恩也何謝時以廉孝先生稱之

白廷魁字復古號雪軒灤州人由貢生仕臨縣令出
供具學宮月再課士歲以爲常催科不擾訟獄者
理而遣之不責贖緩時稅桑田助耕歛以不善俯
仰中忌調簡遂拂衣歸與同志論文以壽終子孫
科雋不替

天啓

倫之楷字百式灤州人由丁卯科舉人夙負經濟有
應變才知榮穎時值大盜號一條龍者垂順穎邑
糾衆圍城年餘百計攻擊公應有餘力乃乘夜晦

出奇兵盡殲其醜生獲者自嘆不意死於若手真
男子也叙功以卓異召對平臺擢御史奉命巡漕
擒大蠹以清漕政鬚髮爲白又劾逆帥懦撫又論
陳啓新以上書倖得給諫直聲震殿陛值丁內艱
兼逢
禹革乃築門自實通水火臺使屢薦不
起其志期忠直如此

鄭 卿字省吾灤州人由貢筮仕河南府判清慎自
持有懸魚酌水之風衙齋閒寂與諸名彥彈琴賦
詩抗疏歸里力辭聘徵著省吾詩文集諸書

崇禎

郝譽髦字完璞灤州人由貢士初筮洪銅縣丞治本
平恕百民愛戴值堂令病士民奔籲而臺乞公攝
篆公視事一年以賢能稱令自遜爲莫及遂告去
久之公亦厭繁吏事致政歸與里中同志者遊覽
讌談嘗征遂於少年野老之場莫不得其歡心年
八十餘尚舉一雄二女皆踰耄後得者自明以至
國朝凡爲鄉飲大賓四十餘年康熙乙巳秋自治後
事語家人曰吾將逝矣乃卒享年九十里人罔弗

輟業奔涕焉

康熙

石申字仲生灤州人壬午經魁丙戌會魁公韶華奇
穎詩文初擢管郎成燕許手筆始任庶常屢元館
試奉

命督學南國以成弘古義繩士痛抑萬軋之習所取士
掄大魁者數人經筵久資啟沃以學士擢吏部左
侍郎矢公無欲門絕苞苴有山濤高孝基之風以
抗當事中忌奪職事定後起補刑部左侍郎建慎
刑一疏一時傳誦丁繼母艱服闋補戶部左侍郎

總督倉場例厨饌交際取資斗級衙僧藉此恣性
吞嚼公悉其弊一切罷去日用茗醴皆出自備綜
核多方有益天庾廟堂材公方擬大用值慈母訃
聞歸里哀毀骨立嬰疾不起卒於癸丑三月

司

賜諭祭一壇

盧龍縣古鄉賢人材宦蹟

唐

憲宗

田弘正盧龍人性忠孝好功名起樓聚書至萬餘卷
憲宗時爲魏博節度使封沂國公元和間詔命史
官韓愈撰其先廟碑銘

武宗

周寶盧龍人曾祖侍選爲武城令安祿反拒戰死
之祖光濟左贊善大夫父懷義工部尚書公仕武

宗朝爲簡校工部尚書節度涇原務力耕種聚糧
二十萬斛號良將中和初進同平章事兼天下租
庸副使以功封汝南郡王

明

崔維嶸字嵐峯盧龍人由貢士初授清豐令清豐屢
經兵燹戶口凋敝自公招撫流離弭緝群盜重學
勸農考最陞陝西興安州知州招集逃亡貧粟勸
墾期年之內民用輯寧時防兵擾民公執法痛繩
之與守將牴牾請告歸宦囊蕭然躬耕自給子胤

瑜中癸卯科舉人

康熙

翟鳳翥字虞軒盧龍人由貢生訓導平山安重端方
純以忠厚範士士多樂爲親就自常俸外不取不
與告老回里澹寧自處毫不干謁有古君子風
李煒然字含醇盧龍人由貢生以州同改授雲南江
川縣知縣江川地值衝繁數罹兵燹百姓驚鴻甫
定公至悉心撫恤多方安輯設防禦以固城守發
倉廩以集流亡以土司變解任士民鑄石德之

張星煌字斗輝盧龍人由拔貢生以通判改授襄陽
衛經歷代篆宜安縣及均州事治政明決士民欽
服 督撫治三院薦最陞山東東昌府同知有水
藁聲士大夫皆服其貧而有守代州事註誤回里
與同志者講學問字食貧不怨溫良之度人樂近
焉所著有臨場菀及選刊生童試牘諸書

遷安縣鄉賢人物宦蹟

元

崔 濕遷安人事親以孝聞初任遼陽行省郎中程
思忠作亂據永平剽掠鄉民公領兵保障之後官
至參政

明

正統

李 和由進士歷官河南參政清慎詳密祀鄉賢
王 銳由進士授崇明尹天性剛毅歷官都御史值

開城土達滿四謀反討平之有戰功廕其侄世襲
錦衣千戶祀鄉賢

張旻遷安人由貢士訓導崇澤捐俸周乏卒於官
士哀慕之

成化

郭鏞遷安人由進士授金華推官平反詳允罷無
冤獄倡脩通濟橋用資益利涉考選授御史巡按
宣大遼東糾劾權貴綽有直聲轉山西副使督脩
邊墻節省糧耗軍民稱便勞卒於官囊無一資人

稱清介

魏琮由進士爲烏城縣令以廉謹稱樂成就後進
諸名士皆出其門

王永清由舉人知陽武縣尋改延津爲政務尚德化
不事鞭朴民愛戴之

弘治

孫炯遷安人登進士歷陝西苑馬寺卿峭直不附
權貴

李秀遷安人由舉人事繼母孝歷知平原齊河諸

城三縣政務愛民善決疑獄

王 廷登進士授兵科給事中歷山西僉事才德爲時所推祀鄉賢

李 炫幼而好學冬夏兀坐一室舉進士歷甘肅行僕鄉河西叛將煽亂公匿民舍中示方畧而戢之事平誣執甚衆公讞鞫多全活致政二紀課子耕讀足不至官府

陳 爵登進士勤儉明敏歷曹濮彬桂兵備副使臨陣躬帥斬獲甚衆

正德

王 念副使和之子登進士部使欲爲立坊公以貧謝寔之事母孝謹盡以先業畀兩弟知九江府脩補廩民不病役在程蕃秦開貢額使知向化居鄉廉靜足跡不入公府平居鼓琴遊咏居喪用家禮士大夫化之

張文成由吏員任陝縣典史時流寇猖獗逼城公跨馬縶陣多所斬獲總督彭公聞其才智檄領兵馬六千分路勦殺前後得首級千餘顆汝寧上蔡等

路悉平功加三級邑人爲立祠舉八名宦鄉飲二
十九年乞憫輿論

嘉靖

李涵按察副使金之子孝事孀母以田產讓弟登
進士爲戶部郎都兌運尚書稱爲廉吏知延安府
除水患賑饑民備兵肅州脩嘉峪城軍民勒石記
績補貴州兵備洗冤澤物民有天星之謠轉左布
政擒首惡龍許保等苗民率服

張智由貢士知遠定縣潔已奉公刻洗奸僞時

理學校政教大行有麥秀兩岐之瑞尋通州黃州
民不忍其去爲立祠號清張

張文遂由貢士知宜君縣尋調馬邑留心學校加惠
窮民士民德之

王榮由貢士任榆林訓導未幾乞休居鄉友睦嘗
買人田人不忍舍輒還券無難色

李士傑爲諸生時聘陳氏女女後失明人皆勸更聘
公竟娶之人欽其義登鄉薦

國朝

順治

劉光裕遷安人侍郎鴻儒之父以子貴

誥贈兵部右侍郎加一級居鄉施仁尚義慈孝謙恭撫育孤侄聘嫁族女助喪殯骨賑饑施貧甚至不積商人之金不較竊禾之盜尤人情所難士民咸思慕焉祀

劉鴻儒字魯一遷安縣人由丙戌科進士初授戶科都給事兼兵科給事手裁峻厲遇事敢言值畿東鹽法大壞不更於民公爲疏陳利弊極爲剴切幾

撫寧縣鄉賢人材宦蹟

明

隆慶

王胤祥隆慶辛未進士授河南偃城縣知縣吏治澄清恩威並著縣前有苦水井化爲甘泉人咸謂善政之感行取刑科給事中激揚盡力條陳九邊要務當宁嘉納之因劾江陵奪情外轉河南僉事進四川叅議後轉陝西副使當事特薦者凡二十餘疏以親老力辭杜門終養壽幾八旬而終

萬曆

王調元字燮伯號和陽撫寧人由戊午科舉人少孤性至孝父蓋唐公早卒母王孺人撫之食貧措在無間寒暑十七得補博士弟子員學使者竒其文使食餼馬嘗讀書維摩方丈中雜鍾魚梵唄間二十年如一日萬曆戊午舉鄉薦謁臺使者劉公臚王孺人守節撫孤狀劉公疏上報可勅有司旌表烏頭楔掉大書於閭曰故茂才王堯相妻王氏貞節之門辛未以母老乞署教職乃除嵩縣諭倣胡

安定教士法與諸生相切劘嵩人始知師弟之禮勢家僕有辱諸生者聞公不畏強禦惶謝不謹乃已甲戌陞山東臨朐令齊俗夸而好訟猶有六博蹋踰鬪鷄走狗之遺風公一切以寬平簡易治之至有聽斷退食必告王孺人稱善乃敢就舍其孝謹如此時流寇犯河南朝廷用言者議以脩城垣練鄉勇爲守令殿最朐城故版築地高無水屢閉鱗次附女牆而居者千餘家令下之日公曰賊遠在二千里外先使吾民婦子露處失業是人心先

自解也青州道朱公單騎來視高墉屹屹守禦之
具殲悉畢備乃嘆公言爲是時滕人御史張公爲
桑梓計上疏謂宜選良吏以守衝要勅撫按推擇
更調以聞當事者以公應詔乃調知滕縣先是妖
賊徐鴻儒之亂滕人死者無算又其民鄰曹濮其
人輕剽悍疾多推埋探丸之盜公令嚴法治有犯
必誅於是奸盜屏息境內肅然會鄒嶧兩令缺乃
議以公兼攝將以困之也公請於撫軍撫軍戒勿
往而檄太守再擇吏於是太守積不平曰此鞅鞅

者難爲下也居亡何以懃直論劾罷歸公歸二年
山東被兵州縣破者十有六七公爲王孺人壽曰
使我不以得罪上官斥安能視慈母之舍祿乎迺
知忌之者適所以成吾志也公家居三十年足未
嘗一履公庭邑宰到門多以病辭故人在銓部招
之不往又屬臺使起之公惟笑而謝之孝廉張君
啓源與公爲一人之交以其季女爲公子恒婦既
委禽矣張君早世女遭兵燹公不以存亡貧富易
訪得爲恒娶焉季子明妻澹氏其父世烈判禹州

而客死公爲歸其旅襯而養其寡妻誠季子以母
事之凡此皆人所難能者而公顧毅然爲之雖前
史所載范巨鄉之與張劭何以加焉公亡年八十
有五少宰石公儀部余公嘗表志其墓康熙己酉
萊陽宋玉叔先生復贊其世家曰余家青齊之間
驅車而過駢邑之墟其父老多言王公之爲宰誠
長者也後余持節右北平嘗一再造其廬王公輒
謝不見然知其篤行君子也及聞張孝廉與唐州
吏之事不以生死盛衰易心何其深於義耶夫燕
趙古多悲歌慷慨之士而不少概見何哉若王公
者斯無愧於已嗚乎徒循吏也哉

徐應登字子科敦行孝友不昧孤侄遺金鄉黨推重
以明經授真定廣文教人先德行而後文執弟子
佩服不誼

蕭竒楹撫寧人總戎蕭陞孫任漲湫叅將居官數載
持身冰蘖林居食貧無所干謁鄉黨重之

徐延榮字仁甫撫寧人由恩貢通判改授河南新鄉
縣縣丞仍加六品服俸涖任一載固辭而歸致政

還里杜門謝客不入城市人咸重之

王際明由貢士任清河縣學博秉性剛直言不苟
陞陝西沔縣知縣未半月遭防兵通寇夜襲破城
士民驚散公執鐵鎗率家僮與敵賊多有中傷者
公爲亂矢所困猶血戰不屈賊懼乃却未幾復挾
忿調兵嚴攻七月不下積勞成疾告休還里路經
臨清之變誓不倖生登樓自焚山左撫按以難
不苟於逆旅交章入告部覆方下闖賊陷京未沾
卹典人至今痛之

翟凌雲字崑瀛由明經授山東肥城縣令不畏權勢
除巨奸大蠹擢兗州同知濬河有功省帑銀四十
萬爲共事者所忌罷歸林下三十餘年闔門養重
稱鄉望焉

蕭奇棟號擎元撫寧人由息貢初筮山西蒲縣知縣
時流寇猖獗騷擾地方蒲邑凋殘民不聊生公至
撫循多方悉備戰守之具百姓恃以安輯一時載
之尋陞南陽府同知卒於官

王之葵由貢士任江南徐州河糧廳智明胆決不肯

阿狗當流寇之亂州牧自焚公亦堅求自盡士民力救得免以徐水陸要衝南北限界難治易亂各憲司勉呂代篆公勉視事三載撫恤瘡痍安輯流離民得復業一時稱頌不輟

馮泰運字義軒任江南溧水縣知縣履任初敬事愛民興賢禮士溧水士民咸爲欽服嘗相貲二百餘金助脩撫寧學宮及製銅冶祭器百餘件以光春秋祀典以垂不朽尤今人所難者

昌黎縣古鄉賢人物宦蹟

魏

孝文

韓麒麟昌黎人爲人恭慎恒置律令於座傍魏孝文時爲齊州刺史不尚刑法太和中京師饑公表陳時務甚切卒日惟有俸絹數十匹追封燕郡公謚康和

隋

盧勣昌黎人聰悟有才爲渭州刺史多惠政軍民

悅服致有白馬玉漿之瑞累功封楚國公謚襄子
毓忠於煬帝遇害詔贈大將軍封正縣侯謚愍孫
願師襲儀同三司

唐

李光弼昌黎柳城人郭子儀薦其能授河東節度使
公謀定而後戰能以少擊衆天下服其威名唐室
中興戰功推爲第一累功封追榮陽麗王圖形凌
煙閣謚武穆

韓愈字退之昌黎人自晉韓恬入後魏爲玄菟守

恬曾孫徙昌黎棘城故公嘗自稱昌黎人自其曾
祖任曹州司馬因家於河陽而子孫不復在此遂
有河南鄧州之說今昌黎有韓氏祖墳及文公祠
在公三歲而孤會兄貶嶺表兄卒鞠於嫂鄭氏元
和間以文學倡天下學者仰之如泰山北斗累官
至考功郎中知制誥刑部侍郎以諫迎佛骨貶潮
州刺史贈禮部尚書謚文宋元豐元年詔封昌黎
伯特廟祀之

人材補遺

杜源侍郎謙長子舉進士歷青州知府有廉能聲
內行脩謹置義田以周族姓祀鄉賢

杜貴授蘓州府同知陞慶陽知府有德望祀鄉賢
杜漢侍郎謙季子以蔭至南康知府宅心渾厚鄉
里推重祀鄉賢

王槐由儒士工書翰任中書歷工部左侍郎清慎
正直不阿權貴世廟嘉其忠封贈祖父如其官

明

隆慶

齊宗堯知汾州愛民教士積有善政隆慶丁邠城守
有功陞運同

萬曆

齊鳴鳳宗堯長子遼東自在州知州清廉有為剛介
不阿師邑侯孟秋講良知之學鄉里重之

王尚賢翰之子性孝友堂弟郎中尚直乏嗣令次孫
承祧而不利其產居鄉恂恂仁恕因號恕齋知富
平縣有名及歸囊橐蕭然不異寒素孫之屏登科
人以爲善報云

汪可詔任鞏昌府推官蒞政嚴明陞臨洮府同知
張國祥少失怙恃父昂上元至薄死遺妾王氏年十
九砥節苦守公長奉事如禮師邑侯孟秋講學力
行不倦後師楊公啓元悟羅近谿性命宗旨初任
豐潤縣學訓以身率士士風丕變建魁星樓以培
風氣豐庠科甲自此盛焉陞涇源令甦驛弊減雜
徭闌奸保良罷民再起有番里曰南川不習文教
公擇其子弟朱際昌勸課讀書力薦入泮以鼓吹
送歸里中番人聚觀者塞山野文教以興及解綬
鄉里推重之尊如模範歿之日遠近思之子孫科
貢綿綿人謂其貽謀之善報云縣府道舉鄉賢

崇禎

龍呈圖積學富文天資和厚任鄧州佐陞山東都司
經歷庶靜有聲解組歸崇禎庚午捐資鼓士櫻城
守禦以功加四品服授中憲大夫

萬人傑稟性端方謙恭孝謹為諸生即以庶節自飭
庚午之後煮粥賑濟輸金供費晝夜禦守不避矢

石由貢士為祁州訓值大兵攻祁公率衆力守卒
以保全特以性不善阿當道忌之故功不及錄祁
之士民至今頌其德焉祀府庠

田宗周三任廣文賦性仁厚與人交謙謹儼然有道
遺範壽享九十有六

樂亭縣古鄉賢人材宦蹟

金

天會

李 杭樂亭人天會初登進士時平灤兵戈甫定民
未知學公特擇城東南隅勅立先聖廟歲時祭享
以倡明聖教維風振俗徽猷甚遠仕至刺史有聲
於時

明昌

鮮於仲權樂亭人登明昌間進士公博學好古以道

義自重時樂亭無學舍公慨然倡義增建黌舍設
立學館汲引後學人皆知以禮義自閑數年之間
人物彬彬稱盛弟仲畢官至昭信校尉

元

王統世居樂亭剛毅有才力金末為裨將從帥出鎮
高麗東方以寧子元初以功陞大都大同真定等
處粵魯都總管孫挂至元中知商州兼諸軍事接
人謙抑政事秩秩有條商人德之挂子禘剛授武
畧將軍帶金符千夫長

踏不測時論備之以丁艱順治八年補蕃育署丞
重視執掌一介不苟歷陞兵部左侍郎

至正

楊紹先樂亭蔡家庄人由進士至正中為集賢院司
 直學士德行文章為世推重嘗集書三百六十三
 部賚藏本縣學庫備邑弟子員及民間俊秀參考
 博覽子壘仕至濟南路厰次縣尹善篆書不墜家
 聲見邑廟學碑

烈士

國朝

康熙

陳柱國台上社人由行伍康熙十一年援補駐防樂
亭縣把總劇盜伺縣官赴郡會審偽扮行客送極
暗襲入城柱國赴鬪時部伍分守各門不及招集
單身奮擊衆寡不敵中以流矢爲賊所獲縛令導
引以肆劫掠柱國裂眦叱罵遂遇害具題奉
聖旨賞銀壹百兩以襄塋事人皆壯之

山海衛鄉賢人材宦蹟補遺

國朝

順治

呂鳴夏字九三山海人由萬曆乙卯科舉人天性孝
友弟鳴雲歿於王事遺孤幼呱撫訓成立婚娶遊
泮論輿重之初仕清豐諭繼補東鹿勸課有方陞
真定二府分駐宣鎮以抗直取忤掛冠歸里明末
賊逼關門值公家居佐平西王舉義殲寇錄功補
授衛輝太守時天下初定拊安百姓政蹟稱最擢

陝西固原道兵備值降將武大定等謀叛以兵脅之公不少屈歷數其罪罵不絕口遂遇害事聞贈光祿卿蔭葬以酬其忠云入祀鄉賢

程繼賢號敬庵山海人由萬曆二十一年貢監初授中書舍人歷尚寶司卿封朝議大夫公行四事親不諉諸兄父百歲具奏建坊完兄產撫兄子時以孝弟稱有故交戶曹鄧公承簡以事羈京八載有餘公每濟其乏久不厭繁及歿爲具棺殮送歸粵西一友人曾爲錢法督理密以三千金夜送公寓

公郤之且曲爲地復以善言相沮未幾事未敗衆服其有識本衛軍徭銀兩歲派催頭久爲民擾公陳諸當事力除其弊鄉人感悅年踰七旬見後生童穉不挾長態恂恂下濟人亦多親就如怙恃云甲申守官都門不臣逆闖搥幾至死及僑寓天津土寇忽起獨公不屈竟遇害鄉人痛惜之順治庚子本衛士民公呈轉申入祠崇祀

呂鳴章字太呂山海人由選貢公以世胄起家嘗遵父命讓爵與弟順毋心讓產與弟以官廕子侄又

爲亡侄立嗣其孝友如此初筮許州判官當事者
重其才識寄以撫寇之任深入寇壘能不辱命比
旋寇叛躬率家丁巷戰保全闔城百姓尸祝之尋
遷京秩以內艱歸適有悍卒潛謀不軌者撫道覺
之嘗就謀方畧公但策以撫馭得消未形之患甲
申革命時佐平西王吳公興義旅大戰石河努
力殲寇單騎入陣措備糗糧督民餉士錄功補授
戶部山東司員外歷關西道叅議以忤過文休致
還里相國党公重惜之莫能挽也歸林二十年問
耕課讀清素自其子焯如由順治十年貢歷黃陂
宰孫世壇榆庠諸生皆能克纘厥緒云

余一元字占一號潛滄山海人由丁亥進士初授刑
部江南司主事以公持重端方調禮部主客司主
事服官清正不激不阿陞祠祭司員外郎遇事敢
言凡所建白多中要際時以廉介聞歷儀制司加
從四品告疾還里屢徵不就閉戶著書不事干謁
歲時立社講學啓迪後進關門文武諸有司重公
高尚凡有興建莫不就訪以決其議至事有干於

學校名數增減及地方興除大務公更留心救正之紳士咸依公爲師表商民俱愛公如冬日云子瑜廕生所著有潛滄文集八卷及重脩山海關誌爲畿東名畫

樂東龍字雲從山海人由崇禎九年貢公生而穎異識見超卓爲諸生時凡當事者有難決急務每咨訪於公事果得濟初訓靈壽繼補雄縣隨在教法嚴整人欽模範及補壽張有治聲陞平陽府同知年已七旬及還里持躬清介儉素自守教子撫孫

不預外事時以方正長者稱之子正馥由貢生僅趙州學正孫三俱庠生皆有祖風

穆齊英字羽宸山海人由貢監順治元年授河南商城縣縣丞遇覃恩封奉政大夫貴而能謙敦義讓重然諾望重鄉族義訓有方子三長爾謨成進士以部郎擢守萊蕪次爾誥遊京武庠季爾訓登武鄉榜其諸孫振振或遊鄉學或躋成均濟濟多人關門族黨之盛無復出公右者

劉克孔字扶宇山海人由拔貢順治三年授平度州

同知尋遷温州府通判歷六安知州及潞安府同知所在有治聲去後咸歌思不衰康熙初陞山西汾州府知府甫下車興學惠民輕徭薄賦厲冰茹蘗聽斷如神訟者咸歸之大為各憲司所重治汾十年吏服民安考績稱最加一級晉三品秩

劉克肅山海人崇禎五年貢乙酉科副榜任涿州學正純功邃養設教有年榆關知名之士多出其門馮祥聘山海人由順治元年錄功授山東齊河知縣陞湖廣長沙府同知事孀母曲成養志教門徒善

誘成材叅贊宣勞循良著績齊河縣建有專祠王從政山海人由萬曆九年貢任山東萊陽縣知縣多善政被誣萊民代為辯之未白後其子以死疏救得免居鄉稱孝與鄉飲大賓

永平府志卷之二十一

萊陽宋琬遺次

宜興路 遊叅較

廣寧常文魁續補

列女

閨門為風化之原故二南必首關雎宣尼刪詩之意
蓋端厥本也俗尚貞淫治道因之隆替主持風教者
不可不有移風易俗之權此女史有編而列女傳之
弗容已于作也然女有四德斷取諸貞其中從一而
終冰霜勵節守身之凜多有能為男子之所不能為
者觀于斯而世之號為美丈夫反宜對之而增慙焉

又不止爲閨門訓已北平固邊鄙得爲

京畿東輔化行自近代堪紀者實不乏人嗟乎宦光生于
亭羅王嬀出于姊歸未嘗不足爲其地誇艷終不如
黃絹之碑永著曹江綠珠之井遺麗合浦也

金義豐縣令李寶信妻王氏值平州軍亂陷于賊逼室之
王氏罵不從賊怒支解之大定十二年贈貞烈縣君

李伯通妻周氏灤州人周年十六父母許聘李鄰豪覬周
姿欲賄奪之周以死拒卒歸李後伯通爲豐潤令挈妻子
之任金末元兵攻豐潤伯通不知所往周與子易被執周
不屈自投浚塹兵以爲死去之周得不死携易至汴託居
孀李織紵自給教易有成

張氏信武將軍齊某妻錦州故工部尚書九思後也適齊
封汝南縣君能撫其前子將軍觀史張從旁問將軍重之
後將軍卒貞祐初蒙古兵入平灤大掠乃携家之燕亂平
歸業已焚蕩無餘張甘辛苦拮据治家竟能保有宗祀孀
守三十年卒及殯執紼送者千人鄉貢守素其子也

元任椿妻董氏灤州人幼適椿幼盡婦道未二十而椿亾
董勵米霜之操慕共姜之風撫育諸孤元貞二年旌表椿

爲南麓先生五世孫

王宗仁妻宋氏進士宋駿之女也宗仁家永平兵亂偕宋避于鑾子山夫婦爲軍所擄行至玉田有窺宋色美欲害宗仁者宋顧謂夫曰我不幸至此必不以身累君遂携一女投井死時年二十九

陳氏昌黎人父隆累官司徒陳通詩經年二十歸應州邢簡孝舅姑閨門和睦生六子親教以經學後二子抱朴抱質皆仕遼位宰相卒贈魯國夫人

王氏昌黎人李賢卿妻年十八夫故誓不他適紡績以養舅姑始終人無間言至正十五年旌表

明李氏盧龍呂文秀妻年二十二而寡遺孤在哺亦殤李以鍼工自給天順八年旌表

杜氏盧龍生員李達妻侍郎謙之姊也年二十五而寡遺孤二歲杜守而撫成天順八年旌表

孫氏盧龍劉儉妻年二十六而寡養舅姑撫孤克盡慈孝成化二十年旌表

周氏盧龍李澤妻年二十五而寡剪髮自誓姑安氏九十餘患風痺不能步履候起居侍湯藥經年歿葬以禮成化

二十年旌表

葉氏盧龍王銘妻年二十三夫亡孤守苦節四十餘年以紡績自給教子有成成化二十年旌表

李氏楊江妻燕河營人夫死無子嘉靖九年敵自黃崖入犯被獲擁之上馬不從大罵見殺

戴氏府學生員陳表妻年二十九而寡撫遺孤以女工自給四十餘年無異萬曆元年旌表

錢氏翟堂妻燕河營人堂卒錢方十九子守忠尚在襁褓奉姑守節姑八十餘終子亦尋卒門無五尺童家無升斗

儲錢與子婦相依爲命人稱雙節

翟氏府學生員李鶚妻年二十七而寡子學孟在抱奉舅姑盡禮撫孤爲諸生守節四十餘年

張氏盧龍進士郭經妻家貧事姑楊氏盡孝夫卒無嗣守節終身

胡氏府學生員李塿妻年二十而寡撫孤守節

霍氏青山駐操艾繡妻年二十餘而寡長齋守志年至八十餘

劉氏盧龍故家女御史韓應庚五十無子知其貞靜求爲

側室父有難色劉曉書史繙晉絡秀傳父解其意乃嫁之
年二十八而應庚卒生子原濬方十餘歲劉扶嫡郝氏坐
堂上呼家僮抱原濬于前慨然諭以撫孤大義內外帖然
崇禎庚午郡城垂危劉盡生平耕織所貯括萬金上軍門
犒師命原濬避難以存韓祀而身與城爲存亾城陷復以
智免

楊氏韓御史側室庚午被執大罵而死

宋氏僉憲韓原善繼妻封孺人賦性貞靜年三十而寡力
持家政遇前子廣業慈愛佐膏火成名士次弘業已出也

甫數歲僉憲卒教之獨嚴今爲知縣

王氏韓華陰令仲子原潔妻樂亭王大司徒孫女也庚午
夫遇害王不憚克穢泣尋夫屍于積骸中即欲枕屍而死
姑徐氏携孤坤業百端勸慰乃忍慟免從逾兩月生遺腹
子泰業苦節守志教子遊泮鄉稱大慈

李氏布政克濁之女適盧龍衛指揮焦承勳居職廉有
父潤風早卒李年二十餘哀毀絕粒誓以殉夫姑諭以遺
孕在腹當念焦氏後李乃勉從姑命生子效良撫孤奉姑
靡不周至終身非至親不回詔旌

韓氏盧龍光祿監事李浣妻封御史廷義女也夫卒無嗣
哀毀盧墓復肖夫像并夫之父方伯公祖郡守公之像築
萬柳莊別業祀之自製詩文書于壁婦道所難得也給事
白瑜勒石記之

陳氏盧龍太僕卿王庭長女適庠生韓昱昌庚午昱昌死
于兵陳扶八旬祖姑携三歲孤遇春皆保全教遇春爲諸
生

陳氏名靜英大僕卿王庭次女字灤州高尚書孤上鳳年
十四庚午亂中鄉紳白某妻羅氏知女美而慧欲爲侄娶

之給太僕夫人云令將選民女迎英避其家英往羅僞言
高闔門被殺強之議婚女不可夜簪高聘釵自縊

秦氏兩當知縣李可培妻盧龍人庚午不屈投井死子生
員正藻被殺婦田氏年十九子端生六日投井救免養祖
姑至九十撫端爲武生守節三十年

彭氏盧龍陸純妻夫故守節撫子松成立年至八十五松
死妻梁氏撫孤完節年至七十五人稱雙節

王氏盧龍生員韓原相妻庚午率子婦呂氏俱縊死

李氏盧龍戶部主事朱文運繼妻年二十六夫亾事姑孝

撫子濟美成諸生

王氏盧龍湯世功妻夫亡守節撫子思道爲叅將

王氏盧龍生員侯王臣妻夫死不食七日而死

陳氏盧龍王自省妻夫死陳年二十餘矢志守節教子耀祖顯祖爲諸生

石氏千總朱鎮胡妻鎮胡從軍歿石年二十餘或憐其少艾無子勸之嫁石悲號欲絕茹辛忍苦紡績資贍幾四十年始終一節

蔡氏邵庠生韓修業妻夫死蔡年少無子苦守四十餘年尚氏盧龍生員李思敬妻姑年衰暮夫患痼疾尚奉養服勞克盡其道姑與夫相繼捐館子枿甫八歲含冰茹荼教之遊泮守志五十餘年

豈氏燕河營宋成祿妻年十九夫亡遺子鴻儒方三月教成諸生食餼年七十餘崇禎十四年旌表

陳氏盧龍舉人廖從周子承訓妻庚午承訓與叔師周俱被害師周妻劉氏病遺孤雅尚未週齡陳恐廖門無後舍已女以乳叔教入泮雅亦以母事之人稱節孝

高氏撫寧金禧妻年二十五禧故子鏞方二歲高撫孤自

守舅姑憐其幼欲奪其志不從人有慕其姿者爭求之高
知夜閉戶窓以艾灼面及覺毀窓入救面灼成瘡矣勤女
紅課鏞讀書鏞官光祿寺署正封高爲孺人年九十終詔
旌

王氏撫寧喬潤妻年二十六潤故男嵩在抱王以節自持
撫子爲明經官山東長山知縣完節詔旌

李氏撫寧姚斌妻年二十七斌故男政襁褓誓不他適紡
績供政讀書政領永樂丁酉鄉薦累官兩浙鹽運使詔旌
以子貴贈太宜人

王氏撫寧翟昊妻年二十五昊故子鵬方三歲王矢節自
守閉門績紡課鵬讀書雖至親亦不見面鵬登正德戊辰
進士授戶部主事詔旌以子貴贈太宜人有翰林院修撰
李廷相叙之

劉氏撫寧生員許俊妻年二十四俊故遺孤幼弱劉撫成
立八十卒人無間言詔旌

李氏撫寧金鶴妻年二十八鶴故無子貞烈自勵矢不他
適感舅妾張氏劉氏同守衣食屢乏節操愈堅詔旌一門
三節

袁氏樞寧生員賈真儒妻年二十八真儒故袁遂絕粒勺水不入口欲從其夫于地下親屬勸之曰姑老子勿汝死何賴強起食親女紅敦儉約上事六十孀姑下樞孱弱二子年逾七十節堅髮白母儀婦道克盡

劉氏昌黎白瑛繼室年二十瑛故樞前室二歲子聰視如已出奉姑紡績始終無二詔旌

汪氏教諭大紳女也適昌黎張湖湖歿汪方二十一自知孀難以存立將已產遺張族就養于母家五十餘年清節著聞

李氏昌黎郭宗愚妻愚早歿李年二十五撫孤子鎮紡績以資衣食九十而卒

李氏昌黎庠生郭然妻然亡李年二十五撫一子一女歷盡艱難至九十卒

王氏昌黎齊道妻道卒王年二十一誓不再嫁勤紡績孝姑嫜貌孤宗堯甫一歲耳撫而教之仕宦若子若孫若曾青擅世業不失皆節所畱也

趙氏昌黎庠生王尚賓妻賓早歿趙二十五撫二女清白苦守

王氏上元主簿張昉妾昉卒于任王甫十九遣有嫡齊氏
 孤子國祥王痛夫亡携孤扶襯還昌黎守節族人欲奪其
 志自縊至再七日不飲食知不可奪乃止撫祥成立且仕
 矣王年七十卒侍妾以節聞者難之矧子非其出也縣官
 為之請表

李氏昌黎王訢妻年二十六守節至八十七卒

李氏昌黎省祭蘇學顏妻年十九守節至五十七卒

孫氏灤州宋昇妻守節天順五年旌表

吳氏灤州王弘妻未二十而寡奉姑訓子七十餘成化四

年旌表

許氏名毓英灤州王侃妻侃卒遺子蕃幼稍長許訓以春

秋成進士為御史受封太孺人弘治十四年旌表

余氏灤州陳瑛妻戶部員外郎璘之女年十七歸瑛二載

瑛暴卒哀毀骨立奉舅姑盡道母憐其無依欲奪志余聞

悲憤成疾以死弘治十四年旌表

王氏灤州劉敬妻守節嘉靖七年旌表

趙氏灤州監生歐陽玳妻守節萬曆十四年旌表

吳氏灤州生員郝邠妻守節萬曆十八年旌表

厲氏灤州王思文妻守節萬曆十九年旌表

陳氏灤州李發妻守節萬曆二十二年旌表

王氏灤州生員李東妻守節萬曆三十六年旌表

張氏灤州生員王許妻守節萬曆四十年旌表

宋氏灤州生員陳蒙貞妻城破殉節詔旌

石氏樂亭人太守石某女適豐潤縣尹王伯川生子守興

伯川早卒其子亦夭石撫其妾子無異已出又丐文立碑

祖塋紀先世功德翁瑣志之爲磨其文而削妾子名石撫

成立比翁卒猶爲立石紀瑣不仕高蹈之志此亦婦人中

之慈孝兩全者

孫氏樂亭宋升妻年二十七升歿家貧二孤襁褓孫日織

夜紡以給衣食後二子相繼亡又撫遺孫成立八十餘卒

天順癸未旌表

王氏樂亭劉敬妻年二十二敬卒遺一女王不再適絰刺

自給年六十五卒嘉靖七年旌表

李氏樂亭官富妻年十九富卒一子襁褓守節四十年無

玷嘉靖八年旌表

葛氏樂亭党文明妻年十八歸党五月而夫逝號痛不輟

其母止之葛曰夫死再嫁豈良婦耶因自縊人覺而救甦夫殯防少弛葛竟縊死

商氏樂亭生員劉孟絃妻子珠甫三月而孤餽粥不給商奉姑盡歡年七十終

楊氏樂亭生員盧繼伯妻年十六于歸未再歲夫歿慟欲俱亡時有娠五月姑李恭人亦孀居諭曰倘得一子亦可承祀柰何死爲果生子閨範甚肅奉姑極孝姑病月餘晝夜扶掖嘗藥及卒哀毀又善奉庶姑宗族多強悍欺孤楊戒子勤學爲諸生

王氏樂亭生員汪必相妻年十九夫歿遺孤襁褓哀毀骨立自縊柩前賴救獲免紡績事姑姑暑月患癰王晝夜洗濯敷藥籲天身代果愈逾數歲姑姑終雖貧殯葬如禮曆艱四十年如一日萬曆二十三年旌表

崔氏永平衛贈鎮撫楊成妻年二十六而寡二子興旺在抱紡績自活宣德二年旌表

茹氏永平衛生員朱廷芳妻年二十一而寡撫孤克儉甘貧守節

張氏東勝左衛知州唐福繼室也年二十四福故遺腹子

永平府志 卷之二十一
三
駟例宜襲張讓族襲衛職教駟成明經任學正子孫綿綿
仕宦

韓氏盧龍衛指揮同知焦慶延妻庚午夫戰死陣間韓即
求死家人力止之出城遠匿山莊守節二十餘年及卒與
夫木主合葬之

王氏東勝衛程玉妻夫亡里媪欲奪其志啗姑以厚利氏
竊知之泣曰妾即婁家兒顧可以利失身乎投繯而死總
兵羅希韓葬之城西蘆岡總理戚繼光爲之立碑

王氏盧龍衛指揮僉事孫鉉妻夫亡年二十二甘貧守節
謝氏永平衛楊太芳妻夫亡絕粒九日而死與夫同棺以
殯

牛氏盧龍衛百戶馬逢時妻夫故守制訓子玉聰列郡廩
生庚午城陷自縊完節

楊氏永平衛監生張世昌妻夫亡無子守節詔旌

楊氏東勝左衛白鏞妻夫歿養姑守節人無間言詔旌

劉氏東勝左衛總旗盧尚欽妻年二十一而寡遺孤彥忠
甫三月欲死以殉姑與父母謂之曰死矣柰孤何乃強從
撫孤有成

華氏撫寧衛軍餘華壽女母潘氏年二十五華壽告回原籍取軍裝去無消息時女方五齡母曰夫去不回女幼無靠我將何之誓守此女貧苦不恤及女稍長母欲議婚女曰母爲我而守節我安忍離母我亦誓與母共甘苦如是者幾四十年母故遂柩母于床側其節益勵破屋半間風雨不蔽親宗弗倚衣食常缺惟閉戶誦經念佛而已甘心窮餓視死如歸校之撫孤依親而守節者不又賢乎哉至萬曆七年病卒年六十餘矣鄰里憐之生常爲給食死復爲助棺完女終身苦節稱異知縣徐汝孝上其事詔旌其居五十八載備嘗艱苦

此多一頁少
第廿九頁

口陣亡時田年二十有九子處矢死靡他至八十七卒孀居五十八載備嘗艱苦

郭氏山海都督張世忠妻壽官郭茂之女也忠死事郭年二十有九幾欲捐生戚屬以撫孤勸矢志二十餘年卒御史溫如璋疏稱夫爲國而死忠妻爲夫而苦節昭哉雙義允矣可嘉特豎牌坊

蕭氏山海生員張雲鶚妻父蕭大壯亦庠生鶚卒蕭年二十有六遺子重之甫五歲室如懸磬苦心撫育竟薦鄉書重立又卒遺妻王氏及幼子三人蕭復艱苦共守後諸孫

長並攻儒業年七十五而終

林氏山海衛卒羅榮妻年二十有七榮死家貧子幼苦志自守卒時九十有六孀居六十九年

郭氏山海衛朱澄之妻父郭洪乃舍人澄卒郭年纔二十二且無子甘守孤貧年八十卒茹荼六十秋

倪氏山海監生藥養義妻養義亾倪年二十有四撫二子苦心訓育誓不二醮八十卒

張氏山海劉復初妻撫寧張畋女也夫卒張年二十有七僅一女語及改適輒慚憤孝養其姑五十二而終

韓氏山海衛千戶高世勲妻年二十六夫歿生子尚忠方懷抱撫育苦守子襲職時韓正七十

劉氏山海衛千戶洪大金妻年二十夫故家徒壁立撫孤成人六十餘年苦節

劉氏山海太學蕭被遠妻罔鄉復禮女年二十八被遠故子女俱無孤守四十餘年閨門不出笑言必謹

林氏山海生員程繼中妻夫歿引刀欲殉毀容斷髮

羅氏山海生員鄭廷獻妻年二十有二而獻死遺一子守節不渝子允升遊泮食餼而羅已老

魏氏山海衛指揮李宗堯妻年二十五夫故無嗣守節六十年

王氏山海庠生蕭裕遠妻知縣從正女也三十而裕遠歿遺一女孤守無他志動循禮法老年而終

魯氏山海儒士穆齊崙妻年十六崙歿僅遺一子魯即欲殉剪髮營葬

周氏山海韓國禎妻少嫠幼孤斷火絕粒日攻鍼指撫子有成

張氏山海儒士辛棟隆妻夫故時張方二十有一家甚貧遺一子尚幼侍養姑舅女紅課子遊泮

楊氏山海生員張翔妻翔孝廉重立季子也孝廉早世孀姑王氏在堂時楊年二十守孤子四歲不辭貧窶孝姑教子祖姑孫三世俱以節聞

孫氏山海廩生蕭行遠妻年二十以室女繼醮行遠克執婦道慮夫無嗣脫珥置媵未育夫故伶仃靡倚孤守四十年臨終幾無殮者

郭氏山海生員譚有臨妻年二十而夫故誓死殉夫幸慈姑多方勸慰鞠養週歲呱兒苦節四十餘年

范氏山海衛十戶張守誠妻篤志孤守允稱苦節

陳氏山海標兵馬如麒之妻麒從鎮將追剿叛兵卸甲中風死陳聞變誓以身殉時年二十五有子甫四歲麒柩停北門外赴柩側哭三晝夜目不暇食不進姑勸以撫孤乃謂姑曰若非爾子耶二十六歲尚不能事姑以終天年此煢煢者又何恃焉遂棄不復顧乘間自縊死關內道范公志完請于巡撫朱公國棟允令配享貞女祠

按關外貞女祠乃祀孟姜女也明末范公志完崇其祀典春秋致享合關門已故諸節婦設位配享其間頒胙于各節婦之家

馮氏灤州生員孟臣極妻庚午兵亂夫被創死馮伏尸飲血欲與同盡舅姑力勸撫孤馮長齋奉竺終養二親塋祭盡禮貞守四十餘年康熙十年督學胡批候題旌

甯棟姐灤州人年十四有殊姿隣人窺其母不在強逼不從哭泣絕食縊死於樹公舉於永平道劉公景耀強逼者置於極典仍遣官致祭題旌

李氏灤州楊德斌妻居海陬幼喪夫冰蘖自勵教二子

暨孫有成苦節六十餘年壽九十無疾自卒道府旌其門

石氏灤州生員倫品著妻夫為翁媵妾劉氏厲死石決志

報夫小祥後自備哈褌緹縹之屬哭別嫡姑入室自縊村
塢遠近奔跡顏色如生灤之士大夫爲傳以烈稱之

邢氏盧龍鄉耆田國祥妻庚午兵燹祥殉難身歿邢攜三
月孤垂城迆難事平家業罄空寒苦自甘教子三傑孫龍
德俱爲郡諸生前成夫志後成子名鄉人稱重之有司旌
其門曰瑤池冰雪

李氏盧龍生員薛文龍妻庚午兵燹龍歿於兵李撫育雙
孤甘貧訓誨長子國佐中辛卯將材武舉孫廷遴爲諸生
協鎮喻旌其門曰節壽全德

李氏盧龍民陳靖策妻夫亡遺姑年耄三孤穉幼李
撫育三十餘年代夫葬母教三子俱成立盧龍縣魏公
限旌其門曰竹屏星月

王氏盧龍民周士昌妻適昌百日以疾歿值公姑年耄
願守遺腹孤宗翰代夫侍奉老親宗翰又歿王仍矢志不
渝近人所難人稱節孝

劉氏盧龍民楊體亨妻夫故守孀侍老姑下撫幼子長
復業次履業俱成立有司旌其門曰幽谷之蘭

張氏遷安榆木嶺軍孫忠妻年二十歸忠纔三月夫病家

貧晝夜舉湯藥不怠夫死潛縊以殉按院扁其門曰烈婦之門

馮氏遷安生員何秉善妻因兵亂被執上馬至青龍河入水中自盡縣有貞烈坊

劉氏遷安生員魏燭妻適魏四載夫歿事姑盡孝撫三孤女擇婿悉爲令人苦守五十餘載蕭條歲月應門無童年七十餘食貧無怨鄉人重之

陳氏遷安三屯營高貴妻秉性堅潔隣有逼而污之者赴井死少保戚公南塘立石井旁題曰全節之井

楊氏遷安拔貢生韓范繼室年二十適范范病故楊號泣欲殉之自縊靈前家人覺而救之既葬仍飲燭而死鄉稱貞烈

朱氏遷安庠生劉光珂之繼妻甫配卽孀撫前室幼子孝事翁姑堅心守節府縣旌其門

余氏遷安民魏高登妻十九夫亾事繼姑恭謹紡績自甘鬻珥塋親教子成立年踰六十節操倍凜

陽氏遷安民楊國奇之妻三十寡居績紡度日孝事公姑攻幼子讀書守節四十餘年教子爲弟子員

王氏撫寧生員王堯相妻年二十二夫故柩前號泣絕食數日毀容絕髮決意殉夫姑勉子幼少慰存活奉姑惟謹撫孤王調元中明萬曆戊午科舉人守節四十九年巡按御史劉公思誨具題云錚錚一具鐵心凜凜滿腔血性姑無缺養九泉子職猶存子賴成名半世書香不泯奉旨給銀三十兩立坊表之

朱氏撫寧民李鶴年妻二十六歲夫故撫子天培成名享年八十六歲有司表其門曰孀節松齡

范氏撫寧民任子孝妻夫歿姑欲奪其志范不從孀居八十餘年壽九十七終有司表其門鶴齡松節

夏氏撫寧生員丘行三妻夫故子女俱無夏甘心守柩四十餘年病故親族爲之合葬

高氏撫寧進士田國足妻年二十八夫故孝事姑舅撫孤成立邑人高其節操有司表其門曰栢節遐齡

楊氏撫寧生員陳鴻策側室夫與嫡妻俱故已無子女衣食不給甘貧不怨有嫡女迎養不肯就食其餓守柩二十餘年如同一日鄉人稱其苦節

惠氏撫寧州同郭朝元妻夫故撫孤成立扁旌曰矢霜和

九

徐氏撫寧生員傅大成妻夫故二十七歲撫孤守節三子皆成立壽享六十扁旌曰孝慈貞壽

惠氏撫寧民茹瑛妻年十九歲夫故撫孤守節四十九年扁旌曰天植貞操

黃氏撫寧民王隆明妻二十七歲夫故守節撫孤成立扁旌曰孝慈節壽

王氏撫寧署渭南知縣蕭箒妻年二十七歲夫故守節撫孤成立

張氏昌黎同知齊士斌繼室六年夫卒張二十四歲無所出撫前妻四子如同已生淡薄自其內外無間道府旌其門

尤氏昌黎庠生宋文燿側室年十九而夫逝與嫡張氏立志堅守撫二孤成立繼嗣兩門皆尤之功有司旌其門

齊氏昌黎監生魏業懋妻夫逝乏嗣委夫產於其族依母家誓守值客兵移駐昌黎與民雜處齊閉門自縊有司旌其門

白氏昌黎進士李雲起妻夫任黎城遇賊身歿白年二十

竝無子女紡績自其艱苦無怨姑舅歿皆白代夫治塋終
無間言

王氏昌黎民谷鍾妻年二十鍾卒誓以死從親族勸不能
解防少怠遂縊死詔旌其烈

劉氏樂亭民楊甲第妻年十八值夫故劉撫遺腹孤鍾秀
苦守訓誨食餼於庠子孫繩繩年八十九終撫道旌其門
齊氏樂亭生員霄君錫妻年二十五值夫故撫四歲孤守
志不奪上事繼姑下撫幼穉紡績食貧今七十有九

史氏樂亭生員魏化淳妻二十四歲夫故遺孤三歲甘貧
守孀撫訓成立爲庠諸生今七十有八

趙氏樂亭民張應贊妻二十一歲夫故遺孤二歲時有巨
富者求聘趙念姑老孤幼兩無所依誓死不嫁姑又復故
撫三歲幼孫成立布衣蔬食八十一卒

劉氏樂亭生員王時衡妻年十九值夫故撫孤與孫相繼
病故又撫曾孫宗祧不絕皆劉氏力也卒年九十

谷氏盧龍恩貢生王顯祖妻生而聰穎端重才德皆出人
右幼失恃卽能代父以主家政及歸王不以世胄女傲其

夫家執婦道惟謹事孀姑十餘年無怠行情容相夫訓子
讀書守正處伯兄伯姆恭敬盡禮無異翁姑疾病扶持竭
力調護同居四十餘年毫無嫌隙撫孤姪卽同己子御僕
婢常存寬恕教子孫婦以和順勤儉處內外戚黨胥篤恩
義奄逝日遠近悲悼如失怙恃淑範足法懿訓可垂以致
夫顯祖爲貢士子基文爲拔貢傑爲庠生孫欽銓鎮鈞會
孫德溥德洪俱業儒半係庠生父子祖孫書香繼美皆谷
母孝慈賢德之所致也府縣旌其門曰賢德可風卒年七
十有二

王氏盧龍耆民馬大德妻大德早歿王撫八歲孤一龍貞
守多年食貧訓誨一龍成立克盡孝道以接宗祧鄉人賢
之有司旌其門曰賢德可嘉

沈氏盧龍耆民王輔妻性至孝事繼姑恭謹不怠繼姑歿
事翁舅如生父常時飲食病時藥餌留心調治夫歿又撫
群孤遴與達選皆能成立子孫繩上見存四世有司旌其
門曰孝慈可風

流寓

天地逆旅何莫非寓然唯賢人君子足跡所至則其地隨在得名逸少之于山陰康樂之于永嘉固矣而蘇東坡亦于黃州有雪堂遠歷惠僖卒買宅陽羨營楚頌亭畱筆扎其肩山故武反不必問人顧貴自立耳弧矢四方亦安必騎欵段馬第使鄉黨稱善人爲但萍踪湮沒塵壤者亦多矣高賢託足則其間覽勝悠遊因時播越亦自有幸不幸而深爲斯地之幸山川增色可不借以並傳

晉趙至字景真代郡人寓居洛陽幼時詣師受業聞父耕叱牛聲投書而泣師怪問之至曰我小未能榮養使老父不免勤苦師甚異之年十四遊太學遇嵇康于學寫石經徘徊視之不能去請問姓名康曰年少何以問耶曰觀君風器非常所以問耳康異而告之後乃亡到山陽求康不得而還又將遠學毋禁之至遂徃狂走三五里輒追得之年十六遊鄴復與康相遇隨康還山陽改名浚字允元康每曰卿頭小而銳童子白黑分明有白起之風矣及康卒至詣魏興見太守張嗣宗甚被優遇嗣遷江夏相隨到滑果得啟棺携父骨歸

夢一老以杖指葬處曰見片磚即可得明日即其地求之明管珍字席之長洲人家世理學品行高邁邑人韓僉憲原善令吳時物色之延歸教授子弟郡人師事之者甚衆珍之教先大節而後文藝日擊時事亟謀南歸至沙流河寄詩與其徒云沙流河口笛聲哀插羽飛塵匹馬來東望遙憐三三子幾人安坐讀書臺

王元輔字玉鉉揚州興化人隨父宦遊永平愛風土淳厚遂家焉元輔姿性過人補郡弟子員每試輒冠軍家貧授

徒養親曲盡誠孝郡人韓令尹應奎負人倫鑒識妻以女
元輔不愛美飾韓女即練衣躬行儉素夫妻相敬如賓有
鮑宣桓少君之風庚午歿于兵志業未遂士論惜之
徐碩字畱侯嘉定人父工岐黃術遷來平碩師事管珍善
檄詞兼精書法爲灤諸生父歿復入京遊公卿間詩文益
進以疾逝碩有死友王復一竭力營殯且厚贍其妻子碩
可謂善于取友者矣

曹珪字公粹上海人曾祖宗閔武宗時名御史以建言被
謫直聲著聞珪幼孤祖漢翹任永平簡校携之官甫弱冠

方伎

藝成而下亦足以見道伯樂相馬庖丁解牛以及盧
扁之醫秋之奕僚之丸擅名厥世皆號國能唯茲爲
故塞地荒畧弗及事淫巧則罕所見稱然多能鄙事
由不試故爾塵埃中固不無小智絕倫者

明顏欽昌黎人善醫洪武初年詔選入院授醫官以院屬
掌之相傳八世孫顏有孚猶世厥官

馬氏字逢瀛昌黎劉公直妻馬自幼聰慧隨父讀書通曆
數識天文洪武二十五年高皇差內臣陳二仔捧寶楮二

百錠召入朝授尚宮司宮正給冠佩歲支俸米六十石至三十一年賜女使差內官穆和送還寧家文皇即位復召二次屢賜寶楮表裏官其子劉政本縣儒學訓導終身趙楷樂亭人邑諸生少聰敏得麻衣訣然不欲以術售樵寧翟中丞鵬林居楷望見輒語人曰翟當起重用第不終耳亡何起至大司馬總督六鎮遭阬王司徒好問不偶意鬱然楷曰君當清貴可上卿無憂不第後果然又能自知休咎俱言如左券

劉冠河南儀封人祖浩從太祖取張士誠有偵功授都督陳培基字心田遼陽人由選貢初知山西遼州致政歸崇禎中寄居永平二十餘年端重自持不事于謁處士大夫鄉隣秩秩有禮人皆以古君子稱至

國朝順治元年以公治行超卓持起爲順天府府尹值明末積習豪棍橫肆公爲民鋤強不少假狃忤當事者黜知江南海州公不愧無愠虛心撫字惠愛及民七年內轉刑部山東司郎中未幾陞延安府知府士民欽服以循良稱陞揚州海防道副使卒於官士民頌之猶子永吉字迪甫初令江寧歷內中書科皆有聲於時咸公憲憲令德宜民宜人之所致云

張鍾英號瑞峰遼東義州衛人戊子貢士以父珉於天啓時司諭盧庠遂家永平公初筮山東定陶令定陶向爲盜藪公甫下車土賊糾衆圍城公率衆堵剿射中賊渠餘黨悉平一時稱壯復鄉飲重賓興除荒蕪招流離治行稱最陞黃河同知去陶日士民鑄石德之順治癸巳黃河泛溢堤堰多決如石香爐富家集南北一帶俱爲水鄉居民漂溺時河北地方皆公所屬公莅任初卽住守河干多方修築節物力恤夫役民之居者役者胥賴安全至今稱頌陞福州府知府以修河積勞未任

康熙

王御世字開泰山西澤州人居家孝友持已恭謹爲澤諸生每試冠軍鄉里稱重之值畿東鹽法壞極臺臣高公巡鹽御史馮公具題僉議統歸綱裔行引認永平六屬增引行鹽公接管之後畱心綜核清理鹽務擇人分任安恤竈戶平料價值裕國利民一時稱快公性敦厚古朴尊賢敬士重然諾尙義氣溫恭慷慨凡有關係地方鄉隣急難卽爲排解不惜重費以週全之毫無矜吝色暨遊太學授六品職公不樂仕進日與士大夫酌酒談文適情山水而已

公自順治庚子來永將二十年平易近人交友始終如一
待僕從全無嚴厲之容居恒與人一無抵牾而人亦毫無
間言皆人所難能也教子業宏策名太學候選州同仲業
偉登庚戌科進士季業隆中乙卯科舉人戊午仲夏公長
逝京邸畿東士民焚鏹者無虛日爲誄文具牲醴以挽公
靈輻者盈庭塞路其令人感慕若此皆從前所未有也前
知府事唐公敬一品其行曰開翁晉之畸人也策名太學
而意不在官混籍魚鹽而謀不計利持杖惠連天爲人排
難解紛緩急有足多者余守北平三載見其非公不至嗜

義如飴心切高之因誌以贈仍額其堂曰我輩中人

揮不受願就醫隨徐武寧調理軍士遂家山海冠世其業
爲醫不輕試藥餌預知吉凶時主政鄔公艱嗣寵姬多人
內有娠者嘗以疾求診脉冠曰請以麩盤印手訖出盤冠
曰此非病乃喜兆也主生男後果驗瘡大司馬家居病痰
一醫自京來邀冠相陪冠一見即告司馬曰亟送回此醫
公疾無恙司馬缺而送之至潞河驛醫爲馬軼躡死預斷
諸如此類號爲神醫

仙釋

秦皇漢武皆求仙海上今猶近島有其駐蹕而仙終不可致况竺乾述苦空後其徒引事浮屠即號爲善知識者類多習貪嗔世法升座談空求其實行修證竟萬不得一流弊忘源自欺欺人深爲四民蠹持世者固不可無韓愈之卓議也二者似不應矜竒長惑然苟遇其人而不據實以著質焉愈滋惑矣故用循次及之至如韓湘子張果老原載昌志其言果老世傳在仙臺山後修煉至今呼爲張果老院石碾石房

遺址尚存按果老遺跡在在多有固宜無所不之若此無明証仙臺名勝第目爲仙蹟可矣莫必其爲果老也韓湘昔文公勉之學曰吾所學者非公所知傳湘爲愈侄及韓滂墓誌乃退之自作自稱叔祖愈滂兄湘湘又爲其侄孫令昌邑西山石上影想像指爲湘子影是又因文公而附會之大率好事者爲之也俱不可以傳信茲不復載

金玉川子姓王氏失其名在灤州長寧店西建庵尸解莫知所在後有人嶺南見焉

元白雲子姓王氏失其名初居灤州五山因鮮卑金吾元帥請住持長寧觀闡玄教至元二年賜號廣德真人

淨聰乃東溟宋氏幼削髮爲僧遊清水興國寺師藹公頗多解悟于是遍歷叢林探華嚴金剛奧旨後于雲峰得訣始歸構庵不出至元乙卯入定諸沙門爲造浮屠有月泉老衲訪道清溪爲聰作銘後至明成化初塔裂啓之止舍利二三存焉

明楊不語灤西人性淳實甘澹泊寡言笑幼出爲僧明初時棲祥雲島古刹在海岸寥寥無村落楊益苦戒嘗寂然

竟日初不哆口講談人呼爲楊不語亦特信其淳實未之
奇後徃徃見有二虎來卧寺門不語汲水飲之虎馴不加
害始知有行至宣德間百歲餘化

馬真一自稱河南人年一百八十餘歲昔在華山學道崇
禎初年來入廣寧居北鎮廟採蘑菇拾野菜爲食時大旱
經畧袁公崇煥曾使人致至祈雨次日果雨但語言顛狂
舉止踈放袁怪之目爲妖妄羈遲山海遇關憲梁公廷棟
尤加親洽與談休咎皆應講經論藝剖抉如流飲食不拘
葷素取足而止談諧之中徃徃皆成讖兆踪跡無常人不

能測後不知所之

祥邁別號如意野老住持昌黎道者山性警敏洞悉禪機
嘗註蓮花經叙及註釋叙成佛前祝曰某愚昧恐不能闡
發大道如文可傳辟而復合乃剪撒之須臾微風鼓奏如
故一字不亂眾皆異之遂刊傳

卦和尚居府東陽山庵娶八妻皆死其壽百六十歲人以
爲採補延年能前知言禍福如神凡訪者或城或莊方出
戶即知之呼妻曰老伴快作飯有幾人來訪未幾大呼曰
再添米又有二人來訪少頃果然八月十五日有劫盜至

先期呼山下莊客伏庵側聞磬聲各赴銅鐵器驚之遂解散又一日知盜來自避庵後高處靜坐盜盈檐歸至庵下百步許迷失道盡一夜力週庵四圍口出若有人拘者齊至卦前視之各盜如夢醒遂叩頭流血卦慰以善言陳利害各還所竊物于故處而去

以上二條未詳世次姑附于後



